

## ■ GLOSSA

# Ina grossa tschagula d'in turisticcher

DA CLAUDIA CADRUVI

**I**ls Grischuns han gugent ils Turitgais. Exact quai ha *Gieri Spescha* da «Grischun Vacanzas» ditg questa emna a la conferenza da pressa a Turitg cura ch'igl è vegnì preschentà la festa «Züri retour». Nagin n'ha reagà. Nagin che avess tratg flad. Dapli che la mesadad dals preschents eran Grischuns. Quels savevan fitg bain che la constataziun dal turisticcher na constat betg. E forsa savevan schizunt ils Turitgais ch'eran preschents quai.

**I**dat segir Grischuns che han gugent in u l'auter Turitgais ch'els enconuschan persunalmain. I dat forsa schizunt Grischuns che han surmuntà ils pregiudizis muntagnards visavi ils citadins da la metropola gronda. Ma sch'insatgi generalisescha e pretenda ch'ils Grischuns han gugent il Turitgais, è quai ina tschagula – e lura anc ina grossa.

**P**er quels che na san betg tge ch'ina tschagula è: I

sa tracta d'in legum resp. d'ina ragisch. A questa ragisch pon ins far giu la palletscha, ins po tagliar si ella e duvrar da cuschinar. La tschagula dat savur a bleras spaisas. En Surselva ha la tschagula dentant anc ina outra muntada. Sch'insatgi «raquinta tschagulas», vul quai dir ch'el na di betg la verdad, ch'el raquinta ina pulenta u ch'el di manzognas.

**M**a da pretender ch'il turisticcher Gieri Spescha haja ditg manzognas fiss memia ferm tubac. Era sch'el ha ditg quai senza vegnir cotschen. E malgrà ch'el stueva atgnamain savoir ch'i na constat insumma betg, fissi brutal da numnar quei ina manzogna. Forsa eri gea in uschenumnà «Freudscher Versprecher». Forsa leva el dir ch'ils «Turitgais han immens gugent ils Grischuns». Gliez fiss gea stà la sontga vardad. Ma lura èsi mitschè ora gist il cuntrari.

**A**d in turisticcher che Astudegia mintga di

ora la chavazza, co ch'el pudess carmalar turists en il Grischun, lez ha probabel il fervent giavisch ch'ils Grischuns amian ils Turitgais. Forsa siemia il turisticcher ch'ils Grischuns beneventian ils hosps cun bratscha averta. Ch'ils Grischuns demussian ina cordialitad spontana visavi quests citadins.

**L**a realitad è dentant – Lencunter tutta sauna raschun – in'outra. Anc adina spretschan ils blers Grischuns ils turists ord la metropola, era sche quels laschan enavos ina massa daners en ils lieus da vacanzas.

**E**n sazez èn ils Grischuns làtras in pau sco ils Talians. Era lez gudognan bain cun ils hosps da la Germania, guardan dentant plitost da surengiu sin ils turists dal nord. Entant ch'ils Tudestgs èn fans ad infinitum da l'Italia. Quai è piter. E gnanca in'entira roschada da tschagulas po cuschentar questa pitradad.